



UPA 2022/126

2/6-2022

Anna Wangenheim

Meeqqatta inuunerup aqquaani unammillernarsinnaasut pitsaanerusumik anigornissaanut qanoq eqqarsartaatsikkut nukittunissaanik tuniorarsinnaanerigut, oqallisissiatut siunnersuut.
(Inatsisartunut ilaasortaq Nivi Olsen, Demokraatit)

Demokraatit Inatsisartunut ilaasortaataannut Nivi Olsenimut qujanaq apeqquteqaat aallaavigalugu oqallisissiaq pingaarutilik saqqummiummagut.

Nuannerpoq, ukiuni kingullerni annertuumik ukkatarineqalermat, qanoq ililluta nunatsinni meerartatta peqqissusaat qulakkeersinnaanerippuit. Naalakkersuisut akissumminni aamma qilanaaruteqarput, suliniutillu arlalippassuit aallartinneqarsimasut saqqummiullugit, tamatta kinguneqarnissaanik isummalluaatigisagut. Isumalluarnerli naammanngilaq, kisitsisit suli tikkussimmata peqqissutsitsinnut atugarissaarnissatsinnullu paasinnittaatsigut misigisagullu suli amigarujussuarmat.

Naalakkersuisut innuttaasunik misissuineq nutaanerpaaq innersuussutigaat, takutitsisoq ilorraap tungaanut ingerlasugut, issuaaneq:

"Nuannerpoq, innuttaasunik misissuinerup nutaanerpaaq takutimmagu ilorraap tungaanut ingerlasoqartoq: nakuusernerit appariartorput angerlarsimaffinnilu imigassartortarnerit appariartorlutik."

Taakku saniatigut neriuutigineqarpoq Klinik Killiliisa. Saaffiginnittarfik ammarmat pisortaa Qanoruumut oqaaseqarpoq, suli ilisimanagu, iluatsilluarnissaanut tunngaviusut suusanersut imaluunniit qanoq amerlatigisut saaffiginnittarfimmik atuinissaat suli ilisimanagu.

Utoqqatseraluarbunga, qulaani nalunaaruteqarneq qanoq ilumoortigaa, politiit ukiumoortumik nalunaarusiaat killormorluinnaq takutitsippat?

Sapaatit akunnerisa naaneri tamaasa tusagassiuititigut takusarpagut, qanoq politiit ulapitsigisut angerlarsimaffinni eqqissiviilliornernut tunngasumik, aamma angerlarsimaffinni meeratalinni. Politiit ukiumoortumik 2021-imut nalunaarusiaasa takutippaattaaq, suli inuiaqatigiinni annertooruujussuarmik ajornartorsiuteqartugut. Saqqummiussaanni quppernermi 2-mit ima allaqqasoqarpoq:

"Politiit isumaqarput kinguaassiuutitigut pinerluttarnerit aammalu nakuusernarnerit inuiaqatigiinni suli annertuumik ajornartorsiutaasut. Nuna taamak pinerluffiunngitsoq nassaarineqarsinnaagunangilaq, kisianni Nunatsinni taakku qaffasittorujussuupput. Danmarkimut Savalimmiunullu sanilliutissagaanni, innuttaaqortussuseq malillugu Nunatsinni nakuusernarnerit Danmarkimit arfinileriaammik aammalu Savalimmiuniit 13-eriaammik qaffasinnerupput. Kinguaassiuutitigut pinerluttarnerit qiviaraanni, Nunatsinni nalunaarutiginnittarnerit Danmarkimi Savalimmiunilu nalunaarutiginnittarnernit arfineq-pingasoriaammik qaffasinnerupput."



Naak, Naalakkersuisut isumaqaraluartut, ilorraap tungaanut ingerlasugut, isumaqarpunga siusippallaartoq "assagut pattassallugit", tassami iliuuserisartakkat imaannaangitsut taamaattut tassanngaannaq unikkunnangimmata. Ilorraap tungaanut ingerlanermik oqalunnerup tunngavigisinnaavaa, piffissami arlaleriarluta mattunneqartarsimanerput, tuniluunnerit il.il. kingunerisaannik, tassami nalunaarutiginnittarnermut aamma sunniuteqarsinnaammat. Qulakkiissavarput, suliniutit aallartinneqarsimasut sunniuteqalersimanersut. Aatsaammiuna Ukiakkut ataatsimiinitssini 2021-im, Inatsisartut pingaarutilinnik marlunnik nakuusertarnermut akiuiniarnissamut suliniutissanik aalajangjisut. Isumaqarpungalu suli naammanngitsut. Suliniutit taakku piffinni pigiliunneqarnissaat isumagissavarput, taamaaliornikkut ileqqunik pisariaqartumik allannguissammata aammalu inuunermut akisussaaqataanermik pisariaqartumik kissaateqalernermik siunissami meeqlanut peqqinnarnerusog anguniarlugu.

Inuaqatigiittut aamma qulakkiissavarput, meerartatta peqqinnissaqarfimmit pitsaanerusumik nakorsarneqarnissaminut periarfissinnissaat, tassani aamma tarnikkut nakorsarneqarnermi. Meeqqat amerlavallaat sivisualaamik misissorneqarnissaminnik utaqqisarput, kingusippallaamillu nakorsarneqalersarlutik. Tamanna pissutigalugu ilaqtariit meerartallit amerlasuut pisortanit sumiginnarneqartarput, immikkut ilisimasalinnik nakorsanik- aamma tarnit pissusaanik ilisimasalinnik ikippallaanik peqarnerput pissutigalugu, taakkumi kisimik nakorsartinnissamut tunngaviusussamik misissuisinnaammata. Meeqqat atuarfii, kommunit peqqinnissaqarfillu nukilaappallaarput akimut suleqatigiinnissaminnut, uffa pisortat meeraq taassumalu ilaqtai qitiutillugit sullissineraallutik.

Ilaqtariit nukissaqarluartut aamma Danmarkimut nuussimapput meeqlamik ikiorserneqannginnerat pissutigalugu. Kikkut tamaasa pisortat aaqqissuussaanerannut akuutitsinissatsinut qulakeerinninnissamut pikkorluppallaqaagut. Inuit innarluutillit tarnikkullu innarluuteqartut naammattumik ikiorserneqanngilluinnarput, tassanilu sapinngisarput tamaat pisariaqartitaat tunniunniarsarisariaqarpagut. Pappiaraq kusanartorsuaq atuutilersittariaqarparput, innarluutilinnut inatsisip anguniagaa innarluutilinnut isumaqatigiissutip malinneqarnissaanik. Atuutilersinnissaali arriippallaaruujussuarpooq. Taamaannerani nunaqqatitsinnik annaasaqarpugut, pisortanit sullineqarnerminnik nukissaarussimasunik, annertuumillu meerartagut sumiginnarpagut periarfissinngilluinnarlugillu inuaqatigiinni inooqataanissaannut.

MIO-p meeqqatta tarnikkut ikiorserneqarnissaannik amigaateqarnermut nassuaataa aamma tigussaasunik assersuuteqarnermini ersersippaa, sukkut ikorsiisariaqartugut. Taamaattumik minnerpaamik qulakkiissavarput meeqqat tarnikkut katsorsarneqarnissaat pitsaanerusumik ingerlatissagatsigu angajoqqaat sullisisullu annilaanganerat pakatsisimancerallu pinngitsoortinniarlugit, meerartatta, angerlarsimaffinni atuarfinnilu aammalu allani kikkut tamarmik ornissinnaasaanni, atugarissaarnissaannik akisussaausuusuni.

Pitsaaneqanngilaq inuaqatigiinni akuusutut misiginermit. Meeqqat peqataatinneqarnermik katerisimaarnernullu misigisimasut tarnikkut peqqinnerullutillu nukittunerusarput. Taamaammat suliassaqarpugut pingaaruteqartumik, inuaqatigiinnit pilersitsissalluta, ataatsimuussusermik pisariaqartumik illersorneqartumik. Uagut inersimasutut meeqlagut assigiinngissuteqarnitsinut akuersaarnissaannik ilinniartitsigutta, aamma inissaqartitsinermik nukittussusermillu ilinniartissavagut. TILIOQ-p tapersersortissarsiorluni "leave no one behind, suliniut "Akaareqatigiitta" atorlugit peqatigiiffiillu



saqqummiussinerat soorlu assersuutigalugu Lykkeliga inuit naapittarfiatigut, aammalu inuuussutissarsiorutut suleqatigalugit assersuutissatsialaapput timikkut tarnikkullu innarluutillit akuerserpalaartumik saqqummiunneqarsinnaanerannut.

Pitsaanerulerteriaqarluinnarpugut paquminartut oqallisiginissaannut timikkut amma/imaluunniit tarnikkut innarluuteqartut pillugit. Inersimasut ullumikkut suliffeqarfinni annertuumik napparsimaneq pissutigalugu sulinngittoortarput. Nunanut allanut sanilliullugit annertunerpaallutik, nunanut kisitsisitigut assersuuttakkatsinnit. Qanittumi oqallisigaarput sulinerup piffissaliunneqarnera sulinerullu nalaani timip aalatinssaa, sulinermi pisariillisaanermut iluarismaarnerlu qulakkeerniarlugit. Tassani uppernarsivarput qanoq annertutigisumik pimmatiginnineq uumisaarinerlu suliffeqarfinni ajornartorsiutaatigisoq, qanorlu annertutigisumik nukissaarunneq uippakajaarnerlu inuaqatigiinni atugaatiginersoq. Peqqinnanngilaq. Inersimasutut inuttullu ataasiakkaatut atugarissaarnissarput isumagisariaqarparput meerartatsinnut nukissaqarluta peqataassagutta. Inuaqatigiinni suliassaq pingaartorujussuaq suliffeqarfiiit inuaqatigiinnilu inuinnaat akornanni annertuumik akisussaaqataaffigisassaat.

Taakkulu saniatigut pisariaqartinneqarpoq, meeqqat atuarfiat meeqqat pisariaqartitaat aallaavigalugit aaqqissuussaassasoq. Suut tamarmik takutippaat, klassini meeqqat ikinnerutillugit ilikkarsinnaaneq pitsaanerusartoq. Nunatsinnili meeqqat atuarfiini klassit amerlasuut 20-vit ataallugit atuartoqartarput, illoqarfiillu pingarnersaanni 20-vit sinnerlugit, ilimanaateqangnilarlu uagut maani Kalaallit Nunaanni atuartut amerlassusaat ilikkarsinnaanerannut utoqqatsissutitut atussallugit inaarutaasumik misilitsitarerit qiviaraanni. Imaassimassaqaq, ilinniartitsinerup pitsaassusaa apeqquaalluinnartoq, meeqqat klassiminni iluarismaarinninnissaannut. Uanga isumaqarpunga, meeqqat pinnguarnermikkut ilinniartinneqarsinnaasut. Aalanermikkut ataqtiginnerat akuunerulernerallu annertusarneqassapput, pinngortitatsinnillu avatangiisitsinnik atuinerup aamma ilorraap tungaanut ingerlaneq annertusassallugu. Atuarfinni ilinniartitsisut ikorfartortariaqarput meeqqanut nappaateqalersimasunut ilisimasaqarluarnissaannut, meeqqat tarnimikkut innarluutillit meeqqanut allanut sanillullugit allatut perorsaanikkut ikorfartortariaqarmata. Isumaqangnilanga, klassimi meeqqamut ikorfartorteqarnerinnaq naammattoq, taakku ikorfartortaaasut naappaataasunik ilisimasaqarnissanik pisariaqartunik aamma taakku peqangippata aammalu perorsaanikkut ikorfartortariaqarlutik. Immikkut atuartitsineq meeqqanut immikkut pisariaqartitsiuinnarnut periarfissaassangnilaq. Atuartitsineq pitsaanerusariaqarpoq, tamanillu akuutitsilluni. Ilinniartitsisunngorniarnermi immaqa ilanngunneqarsinnaagaluarpoq, ilinniartitsisunngorniat ilinniartinneqarnerannut atasumik, klassini naliginnaasuni meeqqat innarluutillit isumassornerat ukkatarineqarnerallu isumagineqarluni?

Akuersaarnerusumik, inissaqartitsisumik minnerunngitsumillu atuilluartumik inuaqatigiit ingerlassagutta uagut inersimasutut siuttusariaqarpugut meerartatta inuusuttattalu oqariartuutaat tusaaniarlugit. Amerlasuut pimmataasarneq ajornartorsiuterujussuartut oqaatigaat, ajoraluartumik ima innarliisinnatigisoq, meerartatta attataat ilaqtariinni alianartut aqqusaaakkat saniagut. Akuerisariaqarparput kingunerlutsitsinerit kinguaariinnit kingornunneqarsinnaammata aammalu akuerisariaqarlugu oqaasinngortitsinissamik pisariaqartitsineq toqqissismaffigisariaqarlugulu, inuaqatigiittut inuuniarnikkut ajornartorsiutit ilungersunartut sularisariaqnerat nipangiutiinnaqinagit.



Inooriaatsimi kingornussat pitsaanngitsut allanngortissinnaavagut, inersimasuuusugut inuuusuttullu sunniiniartartut, akuersaernerullutillu ikioqatigiinnerunerisigut.

Inuaat peqqissuunerunissaat anguniarlugu suliniutip INUUNERITTA III siuliani Naalakkersuisuusimasunit aallartinneqarsimasoq tigussaanerulersinniarlugu, siunertat naammassisinnaavagut "Sianissusikkut peqqissuunissaq"-tut ittumik ussassaaruteqarnikkut, piffinni pigiliunneqartussamik. Apeqquataalluinnarpoq kikkut tamarmik pigiliussinissaat aammalu annertusarneqarluni "innuttaasunut tunngaviusumik tarnikkut ikiueqqaarneq"-mut ilinniutitut, taassumalu saniatigut sullisisunut kommunimalu sulisunut allanut periarfissanngorlugu.

Pingaernertut naggasiutigissavara, aamma pisariaqartitsisoqartorujussuugunarmat sullivinni avatangiisinut inatsisip naleqqussarnissaa aamma sullivinni tarnikkut atugassaritaasut annerusumik ilangunnerisigut taamaasiornitsigut meerartagut inuuusuttortagullu ilinniartissinnaassagatsigit sianissutsikkut peqqissuunissaq tarnikkut timikkullu peqqissuunermit anguneqarsinnaasoq. Inuup inersimasup tamanna aatsaat misigippagu, tamanna akuersaerneqarsinnaavoq meeqqallu peqqissumik ineriartorneranut tunngaviusinnaalluni.

Tassalu oqallinnermut Demokraatit isummersuutigigallagaat.